

## ইউনেস্কোর প্রতিবেদন বিশ্বে প্রতি ১০ শিশুর একজন স্কুলে যাওয়ার সুযোগ বঞ্চিত

বিডিনিউজ টোয়েন্টিফোর ডটকম

বিশ্বে ২৬ কোটি ৩০ লাখ শিশু স্কুলে যাওয়ার সুযোগ পায় না বলে জানিয়েছে জাতিসংঘের শিক্ষা, বিজ্ঞান ও সাংস্কৃতিক সংস্থা ইউনেস্কো। স্কুলবঞ্চিত শিশুদের এ সংখ্যা প্রতি ১০ জনে একজন বলে শুক্রবার এক প্রতিবেদনে জানিয়েছে সংস্থাটি। স্কুলবঞ্চিত শিশুদের এ হার ২০৩০ সালের মধ্যে সব শিশুকে শিক্ষার আলায়ে নিয়ে আসার জাতিসংঘের লক্ষ্যকে কঠিন করে তুলবে বলে মনে করে ইউনেস্কো। তবে সাম্প্রতিক বছরগুলোয় স্কুলবঞ্চিত শিশুদের সংখ্যার 'উঠা-নামা' দেখা গেলেও ২০০০ সালের তুলনায় অবস্থার উন্নতি হয়েছে বলে সংস্থাটির প্রতিবেদনে উল্লেখ করা হয়। ২০০০ সালে ৩৭ কোটি ৪০ লাখ শিশু স্কুলে যাওয়ার সুযোগ পেত না। প্রতিবেদনে বলা হয়, যেসব শিশু স্কুলে যাওয়ার সুযোগ পায় না তাদের একটা অংশ সংঘাতপূর্ণ এলাকায় বাস করে; আর বাকিরা মেয়ে শিশু, যারা এমন সমাজে বাস করে যেখানে নারীদের শিক্ষাকে সমর্থন দেয়া হয় না।

এছাড়াও কিছু শিশু স্কুলবঞ্চিত রয়েছে যারা তাদের দেশে মাধ্যমিক শিক্ষা বাধাতামূলক না থাকায় স্কুলে যাওয়ার সুযোগ পাচ্ছে না। স্কুলের সুযোগ বঞ্চিত শিশুদের মধ্যে অধিকাংশই কিশোর বয়সী। এক বিবৃতিতে ইউনেস্কোর মহাপরিচালক ইরিনা বোকোভা বলেন, 'স্কুলে যাওয়ার বয়স থেকেই শিশুদের অন্তর্ভুক্ত করা এবং এরপর যেন শেখার চক্রে তাকে সেদিকে নজর দেয়াই আমাদের লক্ষ্য। স্কুলবঞ্চিত শিশুদের প্রতিবেদনটি পর্যালোচনা করে চিহ্নিত করে বিশেষ নজর দেয়া হবে মেয়েদের শিক্ষায়, যারা এখনও সবচেয়ে বড় অসুবিধার মুখোমুখি হচ্ছে।

জাতিসংঘের সদস্য দেশগুলো টেকসই উন্নয়ন লক্ষ্যে ২০৩০ সালের মধ্যে অর্জনের জন্য কতগুলো লক্ষ্য ঠিক করেছে, যার মধ্যে বিশ্বজুড়ে শিশুদের প্রাথমিক ও মাধ্যমিক শিক্ষা নিশ্চিত করার কথা রয়েছে। বোকোভা বলেন, 'নতুন তথ্য দেখাচ্ছে, আমরা যদি এসব লক্ষ্য অর্জন করতে চাই তাহলে সামনে অনেক পরিশ্রম করতে হবে।' ইউনেস্কো বলছে, সশস্ত্র সংঘাত শিক্ষার পথে একটি বড় বাধা। বিশ্বে প্রাথমিক বিদ্যালয়ে পড়ার বয়সী স্কুলবঞ্চিত ২ কোটি ২০ লাখ শিশু সংঘাতপূর্ণ এলাকায় বসবাস করে।

স্কুলবঞ্চিত শিশুদের আরেক বড় অংশ সাব-সাহারান আফ্রিকাতে বাস করে, যেখানে মাধ্যমিক স্কুলে পড়ার বয়সী শিশুদের প্রতি পাঁচজনের তিনজনই স্কুলে যাওয়ার সুযোগ পায় না বলে উল্লেখ করা হয় প্রতিবেদনে। এতে জানানো হয়, বিশ্বজুড়ে প্রাথমিক বিদ্যালয়ে পড়ার বয়সী প্রায় দেড় কোটি মেয়ে কখনোই কোনো স্কুলে লগ্ন করার সুযোগ পায়নি; যেখানে ছেলেদের ক্ষেত্রে এ সংখ্যা মাত্র এক কোটি। কখনোই স্কুলে যাওয়ার সুযোগ না পাওয়া মেয়েদের প্রায় অর্ধেক সাব-সাহারান আফ্রিকায় বাস করে।